

随
隐
漫
录

第二
函
十九
册

據四庫全書本

隨隱漫錄

涵芬樓藏版

隨隱漫錄卷一

宋 陳世崇 撰

令製春秋贊云微顯闡幽三體五例嚴乎成言褒貶一字周禮云肇建六典條章煥明萬世之則太平之基日新云大哉盤銘日新其德一盟一思惟湯是則自警云孳孳爲善無怠講習心思唐虞聖道可入又曰私既克理是從中則正公則平操則存德日新鑑銘云湛然厥中惟正是守萬醜千妍於我何有離卦贊云日月麗天德備中正明以繼明聖而益聖艮云兼山曰艮德在知止君子體之思不出位晚望云鷗鷺歸煙渚秋江挾晚晴老漁閒艤艇坐待月華生賞春云珠簾翠幙千門曉麗日和風萬國春乍雨乍晴雖莫測無非天地發生仁社日雨云風催社日雨霏霧處處雞豚樂祀神見說豐年於此卜不妨墊濕社翁巾新涼云新涼燈火又

相親遍閱羣書不厭勤緩視微吟眞樂處那知宮漏夜將分授衣
云從來人事順天時九月纔更卽授衣可笑索裘臨歲晚履霜猶
自未知幾桂云秋桂庭前霽影涼萬重深翠護深黃恭迎兩殿臨
清賞壽斚濃浮月殿香恭和御製賜牟子才韻云視草詞臣地位
高玉堂深夜許焚膏文華瑞世呈儀鳳顧問承恩直禁鼇喜有奇
才追宋軾光膺聖製勝唐綯重修盛典熙朝事千古青編記寵褒
題諸色扇面云履霜知地凍賞雪念民寒山嵐迷曉月海浪起晴
雲鷺起蓮邊曉鷗棲蓼外涼西風敲翠蓋曉露浥紅裳豔紅酣霽
圃冷翠媚秋池聲幽梧葉雨香冷菊花風院子供新茗園丁獻異
花穠華照水澄秋靜冷豔欺風醉露涼一枝翠葉凝秋色萬粟金
英噴古香月篩穠影虛窗靜秋染繁英淨几香千葉喜容迎曉日
萬鈴紫色映朝霞日罩商本
作麗柳塘鶯語滑雨收桃岸燕飛忙瞻棗
堂帖子云歸仁由克己學道在存心堯舜傳心惟以一禹湯受命

本乎中凝華殿云帝德巍巍溫恭允塞心傳精微惟堯是則觀瞻
棖凝華數帖子必有如文中子窺高祖之心於大風歌者故敬錄
之

紫宸殿上壽三十三拜

案下文祇二十三拜疑上三字當作二

三舞蹈初面西立閣門進

班齊牌上升座鳴鞭侍衛起居移班北面躬身聽贊兩拜起直身
搢笏三舞蹈跪左膝三叩頭出笏就一拜又兩拜躬身竢班首奏
聖躬萬福再聽贊拜兩拜移班如初殿中監升殿詣酒尊所教坊
起居殿侍進御茶牀又北面躬身聽贊拜兩拜直身立上公升殿
注酒詣御座前躬進南本作身俛伏致詞並躬身竢上公降階復位聽
贊拜兩拜起躬身竢樞密宣答聽贊拜兩拜移班如初上公升殿
立御座東樂作上飲畢上公受盞降階復位北面躬身聽贊拜兩
拜舞蹈如初不該赴座官先退赴座官躬身聽樞密詣折檻東宣
答訖聽贊拜兩拜升階立席後竢進酒樂作上飲畢舍人贊各賜

酒躬身聽贊拜兩拜起贊各就坐立如故復贊乃坐酒行先上公
次百官搢笏執盞立席後躬身飲訖聽贊拜兩拜復坐食至搢笏
執碟出笏再進酒如上禮三行舍人曰可起立席後俟上公御座
前俛伏跪奏復位降階北面聽贊拜兩拜舞蹈如初鳴鞭捲班凡
正旦朝賀一十九拜三舞蹈初面西立上升座閣門起居班首以
下躬身北面俟舍人宣名訖聽贊拜兩拜舞蹈如前禮躬身俟班
首奏聖躬萬福聽贊拜兩拜起直身立俟樞密升殿班首出班俛
伏致詞並躬身俟班首復位聽贊拜兩拜舞蹈如初起躬身俟樞
密承旨詣折檻東稱有制兩拜起躬身俟樞密宣答訖聽贊拜兩
拜舞蹈如初凡冬至朝賀一十二商本拜一舞蹈初百官面西立
儀仗以下起居知閣次之次讀奏自舍人宣班首以下起居稱賀
北面躬身聽贊拜兩拜起舞蹈如初起躬身俟班首奏聖躬萬福
聽贊拜兩拜起直身立俟樞密升殿班首致詞宣答如正旦禮凡

朔望起居九拜一舞蹈初讀奏自知閣御帶行門以下常起居殿中侍御史大起居七拜百官躬身聽舍人宣班首名北面聽贊拜兩拜舞蹈如初不候贊兩拜班首不離位奏聖躬萬福躬身聽贊拜兩拜起躬身聽贊各祇候捲班凡上殿輪對初面西立舍人引北面躬身聽贊拜聲絕兩拜起躬身聽贊祇候直身立引稍前兩步再躬身聽贊拜兩拜起躬身聽贊祇候面西立俟三省奏事退引升殿立東南角舍人前奏銜位姓名上殿因依引赴御座左側身立搢笏當殿未出笏入手及橫執劄子爲失儀如有宣諭卽口奏云臣官不該殿上拜容臣奏事畢下殿謝恩奏事畢依舊路下殿北面不候贊兩拜隨班凡謝恩初面西立舍人奏姓名引北面贊拜兩拜出殿致詞歸位贊兩拜舞蹈聽贊祇候退凡朝辭面西立舍人奏姓名引北面贊兩拜不出班奏聖躬萬福又贊兩拜出班致詞復位又贊兩拜贊好去如有賜物宣有勅卽搢笏舞蹈三

拜凡賜茶引北面躬身奏聖躬萬福贊兩拜贊就坐升殿立席後再贊乃坐茶至搢笏出笏降階贊兩拜贊祇候退

夫子沒歷秦漢晉宋齊梁陳隋至明皇始封文宣王神宗欲加尊崇禮臣定議爲至神元聖帝而李邦直者獨曰周室稱王陪臣不當爲帝於是僅加元聖二字異代尊崇何預於周果如所言則公亦不可封矣雖萬代帝王之師何假虛名而邦直之罪所當筆誅又執筆以俟

夫子之徒三千一貫之道獨語曾子而曾子一唯幾到列聖處大學十章爲後世帝王治天下之律令格例絜矩卽忠恕也中庸一書彌綸天地參贊化育孔子之道益著而曾思位在弟子下度皇卽位首升侑食舉數千載未行之典爲億萬世將來之法度皇之聖至矣

西山蔡先生訓子曰夸之一字壞人終身凡念慮言語纔有夸心

卽截斷却滿招損謙受益時乃天道曰作事皆依本分屈己饒人終無悔吝錢穀與人交關頭上讓人些少生事一切用柔道理之若識些道理不做好人天地鬼神亦深惡之蓋不識好惡如幼稚如醉人雖有罪可赦若知而故犯王法不可免也曰孝弟忠信不可須臾離若有分毫瞞人底心天地鬼神不恕也曰禍患中第一莫使性氣中外事一切靜柔順理之曰爲善得禍乃是爲善未熟爲惡得福乃是爲惡未深人事盡處方是天理曰欺世盜名者無後吾甚愼之

延平李先生靜坐正心以驗夫喜怒哀樂未發之前氣象爲何如久之而知天下之大本真有在乎是也若夫致虛極守靜篤不思善不思惡老佛亦同此理但有治世出世體用之不同耳

豹死留皮人死留名朝事梁暮事晉遺下兔園冊子耳此輩與一把算子未知顛倒何益於君國可謂傀儡兒矣煮粥飯僧者都頭

甚操刺六一公化俗語爲神奇者也

蕭蕭馬鳴靜中有動也悠悠旆旌動中有靜也見軍整而靜也昔我往矣楊柳依依今我來思雨雪霏霏寫物態慰人情也張文潛謂雞聲茅店月人跡板橋霜羈旅窮愁想之在目柳塘春水漫花塢夕陽遲春物融洽人心和暢言不能盡張無垢謂雪消池館初春後人倚闌干欲暮時盡山之情意物之容態可入圖畫皆彷彿三百篇之遺意歟

杜少陵贈衛八處士一篇久別倏逢曲盡人情想而味之宛然在目下此則馬上相逢久人中欲認難問姓驚初見稱名憶舊容乍見翻疑夢相悲各問年無愧前作若戴叔倫之歲月不可問山川何處來青出於藍者也

唐人詩工於下生字走月逆行雲芙蓉抱香死笠卸晚峰陰山雨慢琴絃松涼夏健人綠竹助秋聲歲月換紅顏石磴掃春雲畫角

赴邊愁遠帆開浦烟疎雨滴梧桐字字穩帖不覺其生

上諡百三十一神聖賢文武成康獻懿元章釐景宣明昭正敬恭
莊肅穆戴翼襄烈桓威勇毅克壯圍魏安定簡貞節白匡質靖真
順思考曷顯和玄高光大英睿博憲堅孝忠惠德仁智慎禮義周
敏信達寬理凱清直欽益良度類基慈齊深溫讓密厚純勤謙友
祈廣淑儉靈榮厲比絜舒賁逸退訥悃速懋宜哲察通儀經庇協
端休悅綽容確恆熙洽紹世果用之君親焉用之臣子焉中諡十
四懷悼愍哀隱幽冲夷懼恩攜卹愿微用之閔傷焉用之無後者
焉下諡六十五野夸譟伐荒煬戾刺虛蕩墨僇亢干褊專輕苛介
暴虐愎悖凶慢忍毒惡殲曩攘頑昏驕酗湏澆狃侈靡溺僞妄譴
諂誣詐譎詭奸邪慝蠱危圯懦撓覆敗戮庇饕費用之蠻夷焉
用之小人焉

太史梁傅昭子婦嘗得家餉牛肉以進昭曰食之則犯法告之則

不可取而埋之宰牛之禁自梁已然或謂牢字從牛或謂牛土畜也與土宿同位眞武爲北水神亦與土同位故不可食禍福恐人豈理也哉吳恕齋革帥江東時戒宰牛詩曰中和後五日袖香謁南臺田夫趁雨耕歡聲沸如雷老守視爾農服田亦勞哉有牛負犂者俄頃一週迴無牛人代耕四夫盡力推四夫力雖疲不如一牛犂一牛當四夫功力大如斯農以牛爲命愛牛如愛兒愛兒惟恐傷殺牛何忍爲老守今奉勸戒之重戒之宰牛國有禁殺牛天所災留取黑牡丹年年待花開盧柳南卻人送牛肉小簡云昔人亦珍此味所謂如享太牢是也然一犂春雨數町秋雲旣食其力又食其肉可乎余不忍敢請改命理語讀之惻然

西山眞先生點先君集中警句如闌戶夜通月掬泉朝飲星煖曝花巖日晴眠蘚石煙地曠日難曉海寬天欲浮與子纔分手何人更賞心遊歸雲衲破定起石牀溫道至無偏黨心何有重輕萬事

豈容人有意一春多被雨無晴

疑當作情

仰

商本作舉

頭莫看王侯面失脚

恐爲名利人千古留芳惟好句一時得意總微塵石湖歸途云人
與西風結約來芙蓉花氣撲吟盃曲塘好處都行遍帶得一身秋
色回城東看柳云翻煖爲寒一信風畫橋南北岸西東春歸楊柳
無私意深淺青黃自不同上林歸鴉云夕陽鴉背斂殘紅萬點飛
歸傍帝宮應是上林棲宿穩可曾驚散月明中友人官滿云三年
官滿冰霜潔一日春回宇宙寬曾向廳前種楊柳綠陰留與後人
看東園書所見云娉婷遊女步東園曲徑相逢一少年不肯比肩
花下過含羞却立海棠邊苦吟云水驛荒寒天正霜夜深吟苦未
成章閉門不管庭前月分付梅花自主張蘇堤曉望云荷邊清露
襲人衣風裏明蟾浴曉池涼影潤香吟不得手攀堤柳立多時妾
身恨不事英雄果是英雄安有淚初陽烘霽途繁陰布幽林山禽
互嘲哢爲我流好音傾耳須臾間已快清冷心飛蓋何爲者傲睨

松之陰翻然移他枝餘弄不可尋跋曰學充而意廣氣大而體不偏用力於先聖之書漫塘劉先生曰觀其文詞瞻旨遠爲詩深於運思使人嘉歎不足習庵陳先生曰僕莊騷而奴班馬止堂黃先生曰騷選唐宋罔不究心紫巖潘先生曰出入於江西晚唐之間而不墮於刻與率者也惜端平以後所作諸老不得見之吁有一貨炒栗人坐亡無準秉炬云平生辟辟剝剝做盡萬千手脚今朝撒手便行這回炒得離殼隨隱拈云未敢相許

辛巳八月己丑先君方外友清溪沅禪師坐亡遺偈云六十七年無法可說一片雲收澄潭皎月隨隱拈云年本無期法亦何說末後倒賊虛空著楔咦若遇波騰嶽立時且道月在什麼處

隨隱漫錄卷二

宋 陳世崇 撰

晉侯受王隋內史過知其不能長世趙同獻狄俘于周不敬劉康公知其必有大咎晉侯見魯宣公不敬季文子知其不免卻錡來乞師將事不敬孟獻子知其不亡何爲成子受賑原本誤作賑簡本同據左傳正于社不敬劉康公知其不反齊高厚不敬士莊子知其不免齊侯衛侯不敬叔向知二君之必不免蔡侯不敬子產知其將死伯有不敬穆叔知其必有大咎不敬取禍如響斯答嗚呼毋不敬其堯舜禹湯文武周孔傳心之要法歟

王莽女爲平帝后帝崩莽不能強之下嫁漢兵燒未央宮后曰何面目見漢家赴火自死非特莽愧其女劉歆孔光之徒亦愧矣羊琇女惠風爲愍懷太子妃劉曜陷洛陽以賜其將喬厲仗劍大罵

而死王夷甫諸人不愧乎劉禪降魏見蜀伎不悲有此間樂不思蜀之語孔明之子瞻孫尚戰死張飛之孫遵趙雲次子廣亦戰死北平王譙哭于昭烈廟先殺妻子乃自殺魏以蜀宮人賜將士李昭儀不辱自殺禪不特愧于諸臣子三字商本作將士二字其下有亦字且愧于婦人矣晉靈公不君患宣子驪諫使鉏麇賊之麇曰賊民之主不忠棄君之命不信觸槐而死宋高祖使張偉酖舊君偉曰酖君以求生不如死乃于道自飲而卒子曰有殺身以成仁無求生以害仁此之謂也

東山之詩雨雪寒煖僕馬衣裳室家婚姻出於聖人之忠厚惻怛故能感人也楚子伐蕭師人多寒拊而勉之皆如挾纊遂傳於蕭

明日蕭潰亦窺見此意曹操云行行日已遠人馬同時饑

此下二句商本無另

作托其羣臣又愧其子愧其妾異哉四句不類此下之文雖奸雄善於籠絡人心然得三百篇之遺

衛青少爲平陽公主馬前奴後貴顯公主擇配無踰青者卒歸之

北齊後宮一裙之費至直萬疋周滅其國后妃以賣燭爲業南唐
劉承勳窮奢極侈蓄妓樂數千一妓價數十萬教以藝又數十萬
服飾稱之歸京乞食凍餒死軍卒楊杲宗爲丁晉公築第丁貶海
上朝廷以第賜杲宗劉美善鍛金後貴顯賜上方器視刻工名多
美所造嗚呼世事翻覆往往如此惟德行文章照耀今古彼富貴
者猶蝨蠊醢雞豈止空言徒苦民耳

閻樂引兵入望夷宮二世願得一郡爲王弗許願得爲萬戶侯弗
許願與妻子爲黔首又弗許麾其兵進二世自殺懷帝爲劉聰青
衣行酒愍帝執戟前導行酒執蓋俱不免遇害煬帝先殺其子索
鳩不許自解練巾授令狐行達縊殺之

原本無之字從商本補商本無下朱字

朱全忠殺

昭宗方醉臥遽起單衣遶柱走追而弑之晉王北遷自採木實草
葉食之馮后陰令左右求毒藥欲與晉王俱自殺不果嗚呼君天
下得其道則富有四海失其道求爲匹夫而不得况妻子乎哀哉